

4 1/2 int.
ANSELMO MORICHINIO

EQVITI PIANO


ET IN ROMANA CVRIA ADVOCATO

FRATRI DVLCISSIMO

CAROLVS ALOISIVS S. R. E, PRESB. CARDINALIS

EPISCOPVS AESINATIVM

S. P. D.



Digitized by the Internet Archive
in 2016

Aesium heri liqui, et Planinam tendere ad arcem (1)

Me iuvit, florescit ubi mea villula, frater.

Hic satis ampla domus, Benedicti hic inclyta proles
Incoluit (2), statuitque Patri de more sacellum.

Ergo vere novo vix pingua prata virescunt

Corporis effractas vires animunque relaxo,

Sepositis tandem curis, ac otia quaero.

Scire cupis quid agam, mihi quis sit temporis ordo ?

Ecce sub auroram strato consurgo, Deoque

¹⁰ Vota fero primum, dein Hostia sancta litatur.

Undique, campano turris vix personat aere,

Agricolae sacro intersunt humilesque coloni.

Nullus adest dives ; placet huic requiescere lecto

Neve frui iucundo mane salubribus auris.

Infelix ! terit ipse levi sua tempora somno.

Pocula, ut est moris, mihi matutina parantur :

(1) Pagus ad IX millia passuum ab Urbe Aesina, qua haec occidentem spectat.

(2) Non procul a pago, de quo supra, in amoenissimo col-
lis jugo, sita est villa Cardinalis Episcopi Aesinatium, sedes
olim ac ditio Abbatis a S. Benedicto.

- Tosta faba et trita est, regio quam Mexica mittit,
 Exsectae copulantur arundinis indica mella.
 Marmore sternuntur bina haec, agitata cylindro
- 20 Pressaque miscentur repetitis nisibus : una
 Fit massa, in speciem laterum durata, calenti
 Solvitur hinc unda, versatur turbine ligni
 Dentibus excisis et spumea pocula complet.
 Cinnama misceri parcas et aromata, si vis
 Ne calidus ventrem et praecordia torreat humor.
 Delibes suctu, mellitaque crustula iungas.
 Potio quam nostro dulcis, quam grata palato !
 Quin etiam capiti fesso stomachoque salubris.
 Nam bene tu memoras, frater, quum viscera morbus
- 30 Torqueret gravior, fastidit et improba febris
 Quosque cibos, illam tantum non respuit aeger.
 Indica si mihi cordi est potio, non ego sodes
 Planini spernam collis tua munera, Bacche :
 Coecubo enim dulci antefero veterique phalerno
 Et numeris generosa meis et lenia tollam.
 Sed iam ferre pedem ruris per aprica viarum
 Mens avet, et peragrans auras captare tepentes.
 Mollia namque vocant et rore nitentia prata.
 Ergo Planinam iuvat aut descendere ad arcem,
- 40 Finitimi aut facilem Marcelli scandere clivum (1),
 Unde oculus visu late circumspicit agros
 Florentes, vallesque cavas, atque oppida celsis
 Addita verticibus : parte ac quae vergit ad ortum

(1) Podium S. Marcelli, oppidulum prope Arcem Planinam.

Adriaci vada salsa maris, quaeque adspicit austrum
 Summa Apennini iuga, quae te, maxime vatū (1)
 Ausoniae, sensere, sacro cum carmine cantas,
 Vel quos supplicia excruciant flammaeque perennes,
 Vel quos exercent purganti carcere poenae,
 Quosque Deus vocat ad superos ut pace fruantur.

⁵⁰ Haec loca dum relego cari comitantur amici,
 Doctus Ioannes rethor qui fingit alumnos (2)
 Artibus ingenuis, dulcissima pignora, nostri
 Spem gregis; aut Ioseph barba ac virtute decorus
 Magni Francisci mihi devinctissima proles (3);
 Aut Sanctes ritus callens moresque sacrorum (4).
 Planinam quod si lubeat percurrere villam
 Ordinibus positis hinc inde virentia praebent
 Ridentem myrteta viam: si fulgidus axe
 Sol micat ardenti patulis caput obtegit umbris
⁶⁰ Multa arbor longi digestaque fornicis instar.
 Hic quoque si placeat dabitur considerare fesso.
 Sed mage grata foret tecum mea villula, frater,

(1) E domo rusticationis Eminentissimi Cardinalis Episcopi procul apparet occidentem versus, bifurcum Catriae Montis fastiginum, quo secessit Dantes Aligherius, ut in Camaldulensium solitudine Divinam Comaediā absolveret.

(2) Rev. Dom. Joannes Hannibaldi in Seminario Episcopali Rhetorices Professor.

(3) P. Joseph Fidelis Camers, jam Praefectus in Conventu Aesino Sodalibus Barbatis, quibus a parvo cucullo nomen ductum, atque in Episcopali Seminario Professor.

(4) Rev. D. Sanctes Proicchiani in Cathedralis Ecclesiae Capitulo Beneficiarius, et apud Auctorem Ceremoniarum magister.

- Si vacet, et magnam te forte negotia Romam
 Deseruisse sinant ; pergas huc quaeso parumper ;
 Oh quam, te veniente, animus solabitur aeger !
 At tamen haud doctis furor mea tempora chartis,
 Nunc levibus versor studiis, nunc seria tracto.
 Namque verenda manu persaepe volumina verso
 Quae Deus inspirat ; vel quae clarissima mundi
 70 Lmmina doctores graii aut scripsere latini.
 Mente modo recolo dudum iuvenilibus annis
 Quae mihi deliciae fuerunt tua carmina, Flacce,
 Vel tua, docte Maro, mihi quo non carior alter.
 Hora tamen mediae cum praeterlapsa diei est
 Extimulat venter frugali accumbere mensae.
 Hic mihi pulmenti patina est et fercula tantum
 Bina, et trina ullus si forte advenerit hospes,
 Vernantes herbae, lectique ex arbore fructus,
 Molliia fraga iugis qua tempestate rubescunt.
 80 Post haec somniculo iuvat indulgere per horam,
 Ut fessas reparem vires : nam tardior aetas
 Ecce venit, decies seni volvuntur et anni.
 Inde sacerdotum praestat cecinisse diurnas
 Nocturnasque preces ; veniam exorare necesse est,
 Et pacem quum tanta premant incommoda vitae.
 Quandoquidem crudele iugum, crudelia iussa
 Perferimus, patriae mendaci urgemur amore,
 Hinc italus nobis, haud barbarus imminet hostis.
 Desero dein aedes rursus, comitesque requiro
 90 Ut comi fruar alloquio et solamen apricae
 Sit mihi dulce viae. Quamque, o Sanctissima Virgo,

Aediculam struxit pietas peto. Poplite flexo
 Vota fero supplex, florum et munuscula pono (1).
 At iam stat revocare gradum sedemque subire.
 Nam caput occuluit sol, nox ruit humida coelo.
 Expletis iterum precibus, tandem inter amicos
 Chartas, quoque die mundi quae facta retexunt,
 Perlegimus, variasque vices animo haud tamen aequo.
 Omnia enim turbis miscentur et omnia luctu.

400 Saevit ubique agitatque faces immitis erymnis,
 Spreta heu relligio! sacris deserta ministris
 Templâ Dei passim spoliis viduantur avitis;
 Pellitur et claustris virgo. Loca dedecus urbis
 Turpia cuique patent. Florenti vere iuventus,
 Indignor referens! studiis raptatur iniquis
 Progenies italîs vitiosior. O Bona Mater,
 O Virgo, o fer opem; roseis sic vota corollis,
 Nectimus orantes extremo vespere: sic te
 Prosequimur precibus. Sed iam, dulcissime frater,
 410 Finis epistolii sit, finis namque diei.

Calendis maiis anni MDCCCLXIV.

(1) Aequo prope intervallo a Podio S. Marcelli et Arce Planina, Aediculam Dei Genitrici Sacram Auctor erigendam curavit.
